

四庫全書

史部

欽定四庫全書

史部

通鑑紀事本末卷三

上

詳校官編修臣程槐

編修臣裴謙履勘

總校官檢討臣何思鈞

校對官中書臣李奎

謄錄監生臣劉偉勲

欽定四庫全書

通鑑紀事本末卷三上

宋 袁樞 撰

漢通西南夷

漢武帝元光五年 初王恢之討東越也使番陽令唐蒙風曉南越南越食蒙以蜀枸醬蒙問所從來曰道西北牂柯江牂柯江廣數里出番禺城下蒙歸至長安問蜀賈人賈人曰獨蜀出枸醬多持竊出市夜郎夜郎者

臨牂柯江江廣百餘步足以行船南越以財物役屬夜郎西至桐師然亦不能臣使也蒙乃上書說上曰南越王黃屋左纁地東西萬餘里名為外臣實一州主也今以長沙豫章往水道多絕難行竊聞夜郎所有精兵可得十餘萬浮船牂柯江出其不意此制越一奇也誠以漢之彊巴蜀之饒通夜郎道為置吏甚易上許之乃拜蒙為中郎將將千人食重萬餘人從巴蜀笮關入遂見夜郎侯多同蒙厚賜喻以威德約為置吏使其子為令

夜郎旁小邑皆貪漢繒帛以為漢道險終不能有也乃
且聽蒙約還報上以為犍為郡發巴蜀卒治道自犍道
指牂柯江作者數萬人士卒多物故有逃亡者用軍興
法誅其渠率巴蜀民大驚恐上聞之使司馬相如責唐
蒙等因諭告巴蜀民以非上意相如還報是時邛笮之
君長聞南夷與漢通得賞賜多多欲願為內臣妾請吏
比南夷天子問相如相如曰邛笮冉駹者近蜀道亦易
通秦時嘗通為郡縣至漢興而罷今誠復通為置郡縣

愈於南夷天子以為然乃拜相如為中郎將建節徃使
及副使王然于等乘傳因巴蜀吏幣物以賂西夷邛笮
冉駹斯榆之君皆請為內臣除邊關關益斥西至沫若
水南至牂柯為徼通零闕道橋孫水以通邛都為置一
都尉十餘縣屬蜀天子大說 是時巴蜀四郡鑿山通
西南夷道千餘里戍轉相餉數歲道不通士罷餓離暑
濕死者甚衆西南夷又數反發兵興擊費以鉅萬計而
而無功上患之詔使公孫弘視焉還奏事盛毀西南夷

無所用上不聽

元朔三年冬以公孫弘為御史大夫是時方通西南夷
東置蒼海北築朔方之郡公孫弘數諫以為罷敞中國
以奉無用之地願罷之天子使朱買臣等難以置朔方
之便發十策弘不得一弘乃謝曰山東鄙人不知其便
若是願罷西南夷蒼海而專奉朔方上乃許之春罷蒼
海郡 秋罷西夷獨置南夷夜郎兩縣一都尉稍令犍
為自葆就專力城朔方

元狩元年 初張騫自月氏還為天子言身毒國去蜀不遠天子欣然令騫因蜀犍為發間使王然子等四道並出出驢出冉出徙出邛僂指求身毒國各行一二十里其北方閉氏笮南方閉嵩昆明昆明之屬無君長善寇盜輒殺略漢使終莫得通於是漢以求身毒道始通滇國滇王當羌謂漢使者曰漢孰與我大及夜郎侯亦然以道不通故各自以為一州主不知漢廣大使者還因盛言滇大國足事親附天子注意焉乃復事西南夷

三年秋上將討昆明以昆明有滇池方三百里乃作昆明池以習水戰是時法既益嚴吏多廢免兵革數動民多買復及五大夫徵發之士益鮮於是除千夫五大夫為吏不欲者出馬以故吏弄法皆謫令伐棘上林穿昆明池

元鼎六年冬馳義侯發南夷兵欲以擊南越且蘭君恐遠行旁國虜其老弱乃與其眾反殺使者及犍為太守漢乃發巴蜀罪人當擊南越者八校尉遣中郎將郭昌

衛廣將而擊之誅且蘭及邛君笮侯遂平南夷為牂柯
郡夜郎侯始倚南越南越已滅夜郎遂入朝上以為夜
郎王冉駹皆振恐請臣置吏乃以邛都為越巂郡笮都
為沈黎郡冉駹為汶山郡廣漢西白馬為武都郡

元封二年 初上使王然于以越破及誅南夷兵威風
喻滇王入朝滇王者其衆數萬人其旁東北有勞深靡
莫皆同姓相仗未肯聽勞深靡莫數侵犯使者吏卒於
是上遣將軍郭昌中郎將衛廣發巴蜀兵擊滅勞深靡

莫以兵臨滇滇王舉國降請置吏入朝於是以為益州
郡賜滇王王印復長其民是時漢滅西越平西南夷置
初郡十七且以其故俗治毋賦稅南陽漢中以徃郡各
以地比給初郡吏卒奉食幣物傳車馬被具而初郡時
時小反殺吏漢發南方吏卒徃誅之間歲萬餘人費皆
仰給大農大農以均輸調鹽鐵助賦故能贍之然兵所
過縣為以訾給毋乏而已不敢言擅賦法矣

六年漢既通西南夷開五郡欲地接以前通大夏歲遣

使十餘輩出此初郡皆閉昆明為所殺奪幣物於是天子赦京師亡命令從軍遣拔胡將軍郭昌將以擊之斬首數十萬後復遣使竟不得通

昭帝始元元年夏益州夷二十四邑三萬餘人皆反遣水衡都尉呂辟胡募吏民及發犍為蜀郡犍命往擊大破之

四年西南夷姑繒葉榆復反遣水衡都尉呂辟胡將益州兵擊之辟胡不進蠻夷遂殺益州太守乘勝與辟胡

戰士戰及溺死者四千餘人冬遣大鴻臚田廣明擊之
六年詔以鉤町侯毋波率其邑君長人民擊反者有功
立以為鉤町王賜田廣明爵關內侯

淮南謀反

漢文帝前三年 初趙王敖獻美人於高祖得幸有娠
及貫高事發美人以坐繫河內美人母弟趙兼因辟陽
侯審食其言吕后吕后妬弗肯白美人已生子恚即自
殺吏奉其子詣上上悔名之曰長令吕后母之而葬其

母真定後封長為淮南王淮南王蚤失母常附吕后故
孝惠吕后時無患而常心怨辟陽侯以為不彊爭之於
吕后使其母恨而死也及帝即位淮南王自以最親驕
蹇數不奉法上常寬假之是歲入朝從上入苑囿獵與
上同車常謂上大兄王有材力能扛鼎乃往見辟陽侯
自袖鐵椎椎辟陽侯令從者魏敬剉之馳走闕下肉袒
謝罪帝傷其志為親故赦弗治當是時薄太后及太子
諸大臣皆憚淮南王淮南王以此歸國益驕恣出入稱

警蹕稱制擬於天子素盞諫曰諸侯太驕必生患上不聽

六年淮南王長自作法令行於其國遂漢所置吏請自置相二千石帝曲意從之又擅刑殺不辜及爵人至關內侯數上書不遜順帝重自切責之乃令薄昭與書風諭之引管蔡及代頃王濟北王興居以為儆戒王不說令大夫但士伍開章等七十人與棘蒲侯柴武太子竒謀以輦車四十乘反谷口令人使閩越匈奴事覺有司

治之使使召淮南王王至長安丞相張蒼典客馮敬行御史大夫事與宗正廷尉奏長罪當棄市制曰其赦長死罪廢勿王徙處蜀郡嚴道邛郵盡誅所與謀者載長以輜車令縣以次傳之袁盎諫曰上素驕淮南王弗為置嚴傳相以故至此淮南王為人剛今暴摧折之臣恐卒逢霧露病死陛下有殺弟之名奈何上曰吾特苦之耳今復之淮南王果憤恚不食死縣傳至雍雍令發封以死聞上哭甚悲謂袁盎曰吾不聽公言卒亡淮南王

今為奈何盎曰獨斬丞相御史以謝天下乃可上即令丞相御史逮考諸縣傳送淮南王不發封餽侍者皆棄市以列侯葬淮南王於雍置冢三十戶

七年民有歌淮南王曰一尺布尚可縫一斗粟尚可舂兄弟二人不相容帝聞而病之

八年夏封淮南厲王子安等四人為列侯賈誼知上必將復王之也上疏諫曰淮南王之悖逆無道天下孰不知其辜陛下幸而赦遷之自疾而死天下孰以王死之

不當今奉尊罪人之子適足以負謗於天下耳此人少壯豈能忘其父哉白公勝所為父報仇者大父與叔父也白公為亂非欲取國代主發忿快志刺手以衝仇人之匈因為俱靡而已淮南雖小黥布嘗用之矣漢存特幸耳夫擅仇人足以危漢之資於策不便予之衆積之財此非有子胥白公報於廣都之中即疑有刺諸荆軻起於兩柱之間所謂假賊兵為虎翼者也願陛下少留計上弗聽

十一年夏六月徙城陽王喜為淮南王

十六年夏四月徙淮南王喜復為城陽王立淮南厲王子阜陵侯安為淮南王

景帝前四年 初七國反淮南王欲發兵應之其相將

兵城守不聽王而為漢淮南以故得完

事見七國之叛

武帝建元二年冬十月淮南王安來朝上以安屬為諸父而材高甚尊重之每宴見談語昏暮然後罷安雅善武安侯田蚡其入朝武安侯迎之霸上與語曰上無太

子王親高皇帝孫行仁義天下莫不聞宮車一日宴駕
非王尚誰立者安大喜厚遺蚡金錢財物

元朔二年冬賜淮南王几杖母朝

五年 初淮南王安好讀書屬文喜立名譽招致賓客
方術之士數千人其羣臣賓客多江淮間輕薄士常以
厲王遷死感激安建元六年彗星見或說王曰先吳軍
時彗星出長數尺然尚流血千里今彗星竟天天下兵
當大起王心以為然乃益治攻戰具積金錢郎中雷被

獲罪於太子遷時有詔欲從軍者輒詣長安被即願奮
擊匈奴太子惡被於王斥免之欲以禁後是歲被亡之
長安上書自明事下廷尉治蹤跡連王公卿請逮捕治
王太子遷謀令人衣衛士衣持戟居王旁漢使有非是
者即刺殺之因發兵反天子使中尉宏即訊王王視中
尉顏色和遂不發公卿奏安壅閼奮擊匈奴者格明詔
當棄市詔削二縣既而安自傷曰吾行仁義反見削地
恥之於是為反謀益甚安與衡山王賜相責望禮節間

不相能衡山王聞淮南王有反謀恐為所并亦結賓客
為反具以為淮南已西欲發兵定江淮之間而有之衡
山王后徐來讚太子爽於王欲廢之而立其弟孝王囚
太子而佩孝以王印令招致賓客賓客來者微知淮南
衡山有逆計日夜從容勸之王乃使孝客江都人枚赫
陳喜作輜車鍛矢刻天子璽將相軍吏印秋衡山王當
入朝過淮南淮南王乃昆弟語除前隙約束反具衡山
王即上書謝病上賜書不朝

元狩元年淮南王安與賓客左吳等日夜為反謀案輿地圖部署兵所從入諸使者道長安來為妄言言上無男漢不治即喜即言漢廷治有男王怒以為妄言非也王召中郎伍被與謀反事被曰王安得此亡國之語乎臣見宮中生荆棘露霑衣也王怒繫伍被父母囚之三月復召問之被曰昔秦為無道窮奢極虐百姓思亂者十家而六七高皇帝起於行陳之中立為天子此所謂蹈瑕候間因秦之亡而動者也今大王見高皇帝得天下

之易也獨不觀近世之吳楚乎夫吳王王四郡國富民
衆計定謀成舉兵而西然破於大梁奔走而東身死祀
絕者何誠逆天道而不知時也方今大王之兵衆不能
十分吳楚之一天下安寧萬倍吳楚之時大王不從臣
之計今見大王棄千乘之君賜絕命之書為羣臣先死
於東宮也王涕泣而起王有孽子不害最長王弗愛王
后太子皆不以為子兄數不害有子建材高有氣常怨
望太子陰使人告太子謀殺漢中尉事下廷尉治王患

之欲發復問伍被曰公以為吳興兵是邪非邪被曰非也臣聞吳王悔之甚願王無為吳王之所悔王曰吳何知反漢將一日過成臯者四十餘人今我絕成臯之口據三川之險招山東之兵舉事如此左吳趙賢朱驕如皆以為什事九成公獨以為有禍無福何也必如公言不可徵幸邪被曰必不得已被有愚計當今諸侯無異心百姓無怨氣可偽為丞相御史請書徙郡國豪桀高貴於朔方益發甲卒急其會日又偽為詔獄書逮諸侯

太子幸臣如此則民怨諸侯懼即使辯士隨而說之倘可激幸什得一乎王曰此可也雖然吾以為不至若此於是王乃作皇帝璽丞相御史大夫將軍軍吏中二千石及旁近郡太守都尉印漢使節欲使人偽得罪而西事大將軍一日發兵即刺殺大將軍且曰漢廷大臣獨汲黯好直諫守節死義難惑以非至如說丞相弘等如發蒙振落耳王欲發國中兵恐其相二千石不聽王乃與伍被謀先殺相二千石又欲令人衣求盜衣持羽檄

從東方來呼曰南越兵入界欲因以發兵會廷尉逮捕淮南太子淮南王聞之與太子謀召相二千石欲殺而發兵召相相至內史中尉皆不至王念獨殺相無益也即罷相王猶預計未決太子即自剄不殊伍被自詣吏告與淮南王謀反蹤跡如此吏因捕太子王后圍王宮盡求捕王所與謀反賓客在國中者索得反具以聞上下公卿治其黨與使宗正以符節治王未至十二月淮南王安自剄殺王后荼太子遷諸所與謀反者皆族天

子以伍被雅辭多引漢之美欲勿誅廷尉湯曰被首為
王畫反計罪不可赦乃誅被侍中莊助素與淮南王相
結交私論議王厚賂遺助上薄其罪欲勿誅張湯爭以
為助出入禁門腹心之臣而外與諸侯交私如此不誅
後不可治助竟棄市衡山王上書請廢太子爽立其弟
孝為太子爽聞即遣所善白羸之長安上書言孝作輶
車鍛矢與王御者姦欲以敗孝會有司捕所與淮南謀
反者得陳喜於衡山王子孝家吏劾孝首匿喜孝聞律

先自告除其罪即先自告所與謀反者枚赫陳喜等公卿請逮捕衡山王治之王自剄死王后徐來太子奭及孝皆棄市所與謀反者皆族凡淮南衡山二獄所連引列侯二千石豪桀等死者數萬人

漢通西域

漢武帝元朔三年 初匈奴降者言月氏故居敦煌祁連間為彊國匈奴冒頓攻破之老上單于殺月氏王以其頭為飲器餘衆遁逃遠去怨匈奴無與共擊之上募

能通使月氏者漢中張騫以郎應募出隴西徑匈奴中
單于得之留騫十餘歲騫得間亡鄉月氏西走數十日
至大宛大宛聞漢之饒財欲通不得見騫喜為發導譯
抵康居傳致大月氏大月氏太子為王既擊大夏分其
城而居之地肥饒少寇殊無報怨之心騫為太中大夫
甘父為奉使君騫初行時百餘人去十三歲唯二人得
還

元狩元年 初張騫自月氏還具為天子言西域諸國

風俗大宛在漢正西可萬里其俗土著耕田多善馬馬
汗血有城郭室屋如中國其東北則烏孫東則于窴于
寘之西則水皆西流注西海其東水東流注鹽澤鹽澤
潛行地下其南則河源出焉鹽澤去長安可五千里
匈奴右方居鹽澤以東至隴西長城南接羌萬漢道焉
烏孫康居奄蔡大月氏皆行國隨畜牧與匈奴同俗大夏
在大宛西南與大宛同俗臣在大夏時見邛竹杖蜀布
問曰安得此大夏國人曰吾賈人往市之身毒身毒在

大夏東南可數千里其俗土著與大夏同以騫度之大
夏去漢萬二十里居漢西南今身毒國又居大夏東南
數千里有蜀物此其去蜀不遠矣今使大夏從羌中陰
羌人惡之少北則為匈奴所得從蜀宜徑又無寇天子
既聞大宛及大夏安息之屬皆大國多奇物土著頗與
中國同業而兵弱貴漢財物其北有大月氏康居之屬
兵彊可以賂遺設利朝也誠得而以義屬之則廣地萬
里重九譯致殊俗威德徧於四海欣然以騫言為然

元鼎二年渾邪王既降漢漢兵擊逐匈奴於幕北自鹽澤以東空無匈奴西域道可通於是張騫建言烏孫王昆莫本為匈奴臣後兵稍彊不肯復朝事匈奴匈奴攻不勝而遠之今單于新困於漢而故渾邪地空無人蠻夷俗戀故地又貪漢財物今誠以此時厚幣賂烏孫招以益東居故渾邪之地與漢結昆弟其勢宜聽聽則是斷匈奴右臂也既連烏孫自其西大夏之屬皆可招來而為外臣天子以為然拜騫為中郎將將三百人馬各

二匹牛羊以萬數齎金幣帛直數千巨萬多持節副使道可便遣之他旁國騫既至烏孫昆莫見騫禮節甚倨騫諭指曰烏孫能東居故地則漢遣公主為夫人結為兄弟共距匈奴匈奴不足破也烏孫自以遠漢未知其大小素服屬匈奴日久且又近之其大臣皆畏匈奴不欲移徙騫留久之不能得其要領因分遣副使使大宛康居大月氏大夏安息身毒于闐及諸旁國烏孫發譯道送騫還使數十人馬數十匹隨騫報謝因令窺漢大小

是歲塞還到拜為大行後歲餘塞所遣使通大夏之屬者皆頗與其人俱來於是西域始通於漢矣西域凡三十六國南北有大山中央有河東西六千餘里南北千餘里東則接漢玉門陽關西則限以蔥嶺河有兩源一出蔥嶺一出于閼合流東注鹽澤鹽澤去玉門陽關三百餘里自玉門陽關出西域有兩道從鄯善傍南山北循河西行至莎車為南道南道西踰蔥嶺則出大月氏安息自車師前王庭隨北山循河西行至疏勒為北道北道

西踰葱嶺則出大宛康居奄蔡焉故皆後屬匈奴匈奴
西邊日逐王置僮僕都尉使領西域常居焉者危須尉
犂間賦稅諸國取富給焉烏孫王既不肯東還漢乃於
渾邪王故地置酒泉郡稍發徙民以充實之後又分置武威
郡以絕匈奴與羌通之道天子得宛汗血馬愛之名曰天馬
使者相望於道以求之諸使外國一輩大者數百小者百餘
人人所齎操大放博望侯時其後益習而衰少焉漢率一歲
中使多者十餘少者五六輩遠者八九歲近者數歲而反

六年博望侯既以通西域尊貴其吏士爭上書言外國奇怪利害求使天子為其絕遠非人所樂往聽其言予節募吏民毋問從來為具備人衆遣之以廣其道來還不能毋侵盜幣物及使失指天子為其習之輒覆按致重罪以激怒令贖復求使使端無窮而輕犯法其吏卒亦輒復盛推外國所有言大者予節言小者為副故妄言無行之徒皆爭效之其使皆貧人子私縣官齎物欲賤市以私其利外國亦厭漢使人

人有言輕重度漢兵遠不能至而禁其食物以苦漢使
漢使之絕積怨至相攻擊而樓蘭車師小國當空道攻
劫漢使王恢等尤甚而匈奴奇兵又時遮擊之使者爭言
西域皆有城邑兵弱易擊於是天子遣浮沮將軍公孫
賀將萬五千騎出九原二千餘里至浮沮井而還匈奴
將軍趙破奴將萬餘騎出令居數千里至匈奴水而還
以斥逐匈奴不使遮漢使皆不見匈奴一人乃分武威
酒泉地置張掖敦煌郡徙民以實之

元封三年冬十二月上遣將軍趙破奴擊車師破奴與輕騎七百餘先至虜樓蘭王遂破車師因舉兵威以困烏孫大宛之屬春正月甲申封破奴為浞野侯王恢佐破奴擊樓蘭封恢為浩侯於是酒泉列亭障至玉門矣六年烏孫使者見漢廣大歸報其國其國乃益重漢匈奴聞烏孫與漢通怒欲擊之又其旁大宛月氏之屬皆事漢烏孫於是恐使使願得尚漢公主為昆弟天子與羣臣議許之烏孫以千匹馬聘漢女漢以江都王建女

細君為公主往妻烏孫贈送甚盛烏孫王昆莫以為右夫人匈奴亦遣女妻昆莫以為左夫人公主自治宮室居歲時一再與昆莫會置酒飲食昆莫年老言語不通公主悲愁思歸天子聞而憐之間歲遣使者以帷帳錦繡給遺焉昆莫曰我老欲使其孫岑娶尚公主公主不聽上書言狀天子報曰從其國俗欲與烏孫共滅胡岑娶遂妻公主昆莫死岑娶代立為昆彌是時漢使西踰葱嶺抵安息安息發使以大鳥卵及黎軒善眩人獻于

漢及諸小國驩潛大益車師扞采蘇蠶之屬皆隨漢使
獻見天子天子大悅西國使更來更去天子每巡狩海
上悉從外國客大都多人則過之散財帛以賞賜厚具
以饒給之以覽示漢富厚馬大角抵出奇戲諸怪物多
聚觀者行賞賜酒池肉林令外國客徧觀名倉庫府藏
之積見漢之廣大傾駭之大宛左右多蒲萄可以為酒
多苜蓿天馬嗜之漢使采其實以來天子種之於離宮
別觀旁極望然西域以近匈奴常畏匈奴使待之過於

漢使馬

太初元年漢使入西域者言宛有善馬在貳師城匿不肯與漢使天子使壯士車令等持千金及金馬以請之宛王與其羣臣謀曰漢去我遠而鹽水中數敗出其北有胡寇出其南乏水草又且徃徃而絕邑乏食者多漢使數百人為輩來而常乏食死者過半是安能致大軍乎無奈我何貳師馬宛寶馬也遂不肯予漢使漢使怒妄言椎金馬而去宛貴人怒曰漢使至輕我遣漢使去

令其東邊郁成王遮攻殺漢使取其財物於是天子大怒諸嘗使宛姚定漢等言宛兵弱誠以漢兵不過三千人疆弩射之可盡虜矣天子嘗使浞野侯以七百騎虜樓蘭王以定漢等言為然而欲侯寵姬李氏乃拜李夫人兄廣利為貳師將軍發屬國六千騎及郡國惡少年數萬人以往伐宛期至貳師城取善馬故號貳師將軍趙始成為軍正故浩侯王恢使導軍而李哆為校尉制軍事

二年貳師將軍之西也既過鹽水當道小國各城守不肯給食攻之不能下下者得食不下者數日則去比至郁成士至者不過數千皆饑罷攻郁成郁成大破之所殺傷甚衆貳師將軍與李哆趙始成等計至郁成尚不能舉況至其王都乎引兵而還至燉煌士不過什一二使使上書言道遠多乏食且士卒不患戰而患饑人少不足以拔宛願且罷兵益發而復徃天子聞之太怒使使遮玉門曰軍有敢入者輒斬之貳師恐因留燉煌

三年公卿議者皆願罷宛軍專力攻匈奴天子業出兵誅宛宛小國而不能下則大夏之屬漸輕漢而宛善馬絕不來烏孫輪臺易苦漢使為外國笑乃案言伐宛尤不便者鄧光等赦囚徒發惡少年及邊騎歲餘而出燉煌者六萬人負私從者不與牛十萬馬三萬匹驢橐駝以萬數齎糧兵弩甚設天下騷動轉相奉伐宛五十餘校尉宛城中無井汲城外流水於是遣水工徙其城下水空以穴其城益發戍甲卒十八萬酒泉張掖北置居延

休屠屯兵以衛酒泉而發天下吏有罪者亡命者及贅
壻賈人故有市籍父母大父母有市籍者凡七科適為
兵及載糒給貳師轉車人徒相連屬而拜習馬者二人
為執驅馬校尉備破宛擇取其善馬云於是貳師後復
行兵多所至小國莫不迎出食給軍至輪臺輪臺不下
攻數日屠之自此而西平行至宛城兵到者三萬宛兵
迎擊漢兵漢兵射敗之宛兵走入保其城貳師欲攻郁
成城恐留行而令宛益生詐乃先至宛決其水原移之

則宛固已憂困圍其城攻之四十餘日宛貴人謀曰王
母寡匿善馬殺漢使今殺王而出善馬漢兵宜解即不
解乃力戰而死未晚也宛貴人皆以為然共殺王其外
城壞虜宛貴人勇將煎靡宛大恐走入城中持王母寡
頭遣人使貳師約曰漢無攻我我盡出善馬恣所取而
給漢軍食即不聽我我盡殺善馬康居之救又且至至
我居內康居居外與漢軍戰熟計之何從是時康居候
視漢兵尚盛不敢進貳師聞宛城中新得漢人知穿井

而其內食尚多計以為來誅首惡者毋寡毋寡頭已至
如此不許則堅守而康居候漢兵罷來救宛破漢軍必
矣乃許宛之約宛乃出其馬令漢自擇之而多出食食
漢軍漢軍取其善馬數十匹中馬以下牝牡三十餘匹
而立宛貴人之故時遇漢善者名昧蔡為宛王與盟而
罷兵初貳師起燉煌西分為數軍從南北道校尉王申
生將千餘人別至郁成郁成王擊滅之數人脫亡走貳
師貳師令搜粟都尉上官桀往攻破郁成郁成王亡走

康居桀追至康居康居聞漢已破宛出郁成王與桀桀令四騎士縛守詣貳師上邽騎士趙弟恐失郁成王拔劍擊斬其首追及貳師

四年春貳師將軍來至京師貳師所過小國聞宛破皆使其子弟從入貢獻見天子因為質焉軍還入馬千餘匹後行軍非乏食戰死不甚多而將吏貪不愛卒侵牟之以此物故者衆天子為萬里而伐不錄其過乃下詔封李廣利為海西侯封趙弟為新時侯以上官桀為少

府軍官吏為九卿者三人諸侯相郡守二千石百餘人
千石以下千餘人奮行者官過其望以謫過行皆黜其
勞士卒賜直四萬錢匈奴聞貳師征大宛欲遮之貳師
兵盛不敢當即遣騎因樓蘭候漢使後過者欲絕勿通
時漢軍正任文將兵屯玉門關捕得生口知狀以聞上詔
文便道引兵捕樓蘭王將詣闕簿責王對曰小國在大
國間不兩屬無以自安願徙國入居漢地上直其言遣
歸國亦因使候匈奴匈奴自是不甚親信樓蘭自大

宛破後西域震懼漢使入西域者益得職於是自燉煌西至鹽澤往往起亭而輪臺渠犂皆有田卒數百人置使者校尉領護以給使外國者後歲餘宛貴人以為昧蔡善諛使我國遇屠乃相與殺昧蔡立母寡昆弟蟬封為宛王而遣其子入質於漢漢因使使賂賜以鎮撫之蟬封與漢約歲獻天馬二匹

昭帝元鳳四年 初扞罕遣太子賴丹為質於龜茲貳師擊大宛還將賴丹入至京師霍光用桑弘羊前議以

賴丹為校尉將軍田輪臺龜茲貴人姑翼謂其王曰賴丹本臣屬吾國今佩漢印綬來迫吾國而田必為害王即殺賴丹而上書謝漢樓蘭王死匈奴先聞之遣其質子安歸歸得立為王漢遣使詔新王令入朝王辭不至樓蘭國最在東垂近漢當白龍堆乏水草常主發導負水擔糧送迎漢使又數為吏卒所寇懲艾不便與漢通後復為匈奴反間數遮殺漢使其弟尉屠耆降漢具言狀駿馬監北地傳介子使大宛詔因令責樓蘭龜茲介

子至樓蘭龜茲責其王皆謝服介子從大宛還到龜茲會匈奴使從烏孫還在龜茲介子因率其史士共誅斬匈奴使者還奏事詔拜介子為中郎遷平樂監介子謂大將軍霍光曰樓蘭龜茲數反覆而不誅無所懲艾介子過龜茲時其王近就人易得也願往刺之以威示諸國大將軍曰龜茲道遠且驗之於樓蘭於是白遣之介子與士卒俱齎金幣揚言以賜外國為名至樓蘭樓蘭王意不親介子介子陽引去至其西界使譯謂曰漢使者持黃金錦繡行

賜諸國王不來受我去之西國矣即出金幣以示譯譯
還報王王貪漢物來見使者介子與坐飲陳物示之飲
酒皆醉介子謂王曰天子使我私報王王起隨介子入
帳中屏語壯士二人從後刺之刃交胸立死其貴人左
右皆散走介子告諭以王負漢罪天子遣我誅王當更
立王弟尉屠耆在漢者漢兵方至毋敢動自今滅國矣
介子遂斬王安歸首馳傳詣闕縣首北闕下乃立尉屠
耆為王更名其國為鄯善為刻印章賜以官女為夫人

備車騎輜重丞相率百官送至橫門外祖而遣之王自
請天子曰身在漢久今歸單弱而前王有子在恐為所
殺國中有伊循城其城肥美願漢遣一將屯田積穀令
臣得依其威重於是漢遣司馬一人吏士四十人由伊
循以填撫之秋七月乙巳封范明友為平陵侯傅介子
為義陽侯

臣光曰王者之於戎狄叛則討之服則舍之今樓蘭王
既服其罪又從而誅之後有叛者不可得而懷矣必以

為有罪而討之則宜陳師鞠旅明致其罰今乃遣使者
誘以金幣而殺之後有奉使諸國者復可信乎且以大
漢之彊而為盜賊之謀於蠻夷不亦可羞哉論者或美
介子以為奇功過矣

宣帝本始二年 初烏孫公主死漢復以楚王戊之孫
解憂為公主妻岑娶岑娶胡婦子泥靡尚小岑娶且死
以國與季父大祿子翁歸靡曰泥靡大以國歸之翁歸
靡既立號肥王復尚楚主生三男兩女長男曰元貴靡

次曰萬年次曰大樂

上遣光祿大夫常惠持節護烏

孫兵共擊匈奴

事見匈奴歸漢

三年上復遣常惠持金幣還賜烏孫貴人有功者惠因
奏請龜茲國嘗殺校尉賴丹未伏誅請便道擊之帝不
許大將軍霍光風惠以便宜從事惠與吏士五百人俱
至烏孫還過發西國兵二萬人令副使發龜茲東國二
萬人烏孫兵七千人從三面攻龜茲兵未合先遣人責
其王以前殺漢使狀王謝曰乃我先王時為貴人姑翼

所誤耳我無罪惠曰即如此縛姑翼來吾置王王執姑翼詣惠惠斬之而還

元康元年 初烏孫公主少子萬年有寵於莎車王莎車王死而無子時萬年在漢莎車國人計欲自託於漢又欲得烏孫心上書請萬年為莎車王漢許之遣使者奚充國送萬年萬年初立暴惡國人不說上令羣臣舉可使西域者前將軍韓增舉上黨馮奉世以衛侯使持節送大宛諸國客至伊循城會故莎車王弟呼屠徵與

旁國共殺其王萬年及漢使者奚充國自立為王

神爵二年烏孫昆彌翁歸靡因長羅侯常惠上書願以
漢外孫元貴靡為嗣得令復尚漢公主結婚重親畔絕
匈奴詔下公卿議大鴻臚蕭望之以為烏孫絕域變故
難保不可許上美烏孫新立大功又重絕故業乃以烏
孫主解憂弟相夫為公主盛為資送而遣之使常惠送
之至燉煌未出塞聞翁歸靡死烏孫貴人共從本約立
岑娶子泥靡為昆彌號狂王常惠上書願留少主燉煌

惠馳至烏孫責讓不立元貴靡為昆彌還迎少主事下
公卿望之復以為烏孫持兩端難約結今少主以元貴
靡不立而還信無負於夷狄中國之福也少主不止繇
後將興天子從之徵還少主

甘露元年夏四月烏孫狂王復尚楚主解憂生一男鴟
靡不與主和又暴惡失衆漢使衛司馬魏和意副候任
昌至烏孫公主言狂王為烏孫所患苦易誅也遂謀置
酒使士拔劍擊之劍旁下狂王傷上馬馳去其子細沈

瘦會兵圍和意昌及公主於赤谷城數月都護鄭吉發
諸國兵救之乃解去漢遣中郎將張遵持醫藥治狂王
賜金帛因收和意昌係瓊從尉輦檻車至長安斬之初
肥王翁歸靡胡婦子烏就屠狂王傷時驚與諸翎侯俱
去居北山中揚言毋家匈奴兵來故衆歸之後遂襲殺
狂王自立為昆彌是歲漢遣破羌將軍辛武賢將兵萬
五千人至燉煌通渠積穀欲以討之初楚王侍者馮嫪
能史書習事嘗持漢節為公主使城郭諸國敬信之號

曰馮夫人爲烏孫右大將妻右大將與烏就屠相愛都
護鄭吉使馮夫人說烏就屠以漢兵方出必見滅不如
降烏就屠恐曰願得小號以自處帝徵馮夫人自問狀
遣謁者竺次期門甘延壽爲副送馮夫人馮夫人錦車
持節詔烏就屠詣長羅侯赤谷城立元貴靡爲大昆彌
烏就屠爲小昆彌皆賜印綬破羌將軍不出塞還後烏
就屠不盡歸諸翎侯民衆漢復遣長羅侯惠將三校屯
赤谷因爲分別其人民地界大昆彌戶六萬餘小昆彌

戶四萬餘然衆心皆附小昆彌

三年五月烏孫大昆彌元貴靡及鳩靡皆病死公主上書言年老土思願得歸骸骨葬漢地天子聞而迎之冬至京師待之一如公主之制後二歲卒元貴靡子星靡代為大昆彌弱馮夫人上書願使烏孫鎮撫星靡漢遣之都護韓宣奏烏孫大吏大祿大監皆可賜以金印紫綬以尊輔大昆彌漢許之其後段會宗為都護乃招還亡叛安定之星靡死子雌栗靡代立

成帝建始四年西域都護段會宗為烏孫兵所圍驛騎
上書願發城郭燉煌兵以自救丞相商大將軍鳳及百
寮議數日不決鳳言陳湯多籌策習外國事可問上召
湯見宣室湯擊郅支時中寒病兩臂不屈申湯入見有
詔毋拜示以會宗奏湯對曰臣以為此必無可憂也上
曰何以言之湯曰夫胡兵五而當漢兵一何者兵刃朴
鈍弓弩不利今聞頗得漢巧然猶三而當一又兵法曰
客倍而主人半然後敵今圍會宗者人衆不足以勝會

宗唯陛下勿憂且兵輕行五十里重行三十里今會宗
欲發城郭燉煌歷時乃至所謂報讎之兵非救急之用也
上曰柰何其解可必乎度何時解湯知烏孫瓦合不能
久攻故事不過數日因對曰已解矣屈指計其日曰不
出五日當有吉語聞居四日軍書到言已解

陽朔四年閏九月烏孫小昆彌烏就屠死子拑離代立
為弟日貳所殺漢遣使者立拑離子安日為小昆彌日
貳亡阻康居安日使貴人姑莫匿等三人詐亡從日貳

刺殺之於是西域諸國上書願復得前都護段會宗上從之城郭諸國聞之皆翕然親附

元延二年 初烏孫小昆彌安日為降民所殺諸翎侯大亂詔徵故金城太守段會宗為左曹中郎將光祿大夫使安輯烏孫立安日弟末振將為小昆彌定其國而還時大昆彌雌栗靡勇健末振將恐為所并使貴人烏日領詐降刺殺雌栗靡漢欲以兵討之而未能遣中郎將段會宗立公主孫伊秩靡為大昆彌久之大昆彌翎

侯難栖殺末振將安日子安犂靡代為小昆彌漢恨不
自誅末振將復遣段會宗發戍已校尉諸國兵即誅末
振將太子番丘會宗恐大兵入烏孫驚番丘亡逃不可
得即留所發兵墊婁地選精兵三十弩徑至昆彌所在
召番丘責以末振將之罪即手劍擊殺番丘官屬以下
驚恐馳歸小昆彌安犂靡勒兵數千騎圍會宗會宗為
言來誅之意今圍守殺我如取漢牛一毛耳宛王鄢支
頭縣橐街烏孫所知也昆彌以下服曰末振將負漢誅

其子可也獨不可告我今飲食之邪會宗曰豫告昆彌
逃匿之為大罪即飲食以付我傷骨肉恩故不先告昆
彌以下號泣罷去會宗還奏事天子賜會宗爵關內侯
黃金百斤會宗以難栖殺末振將奏以為堅守都尉責
大祿大監以雌栗靡見殺狀奪金印紫綬更與銅墨云
末振將弟卑爰寔本共謀殺大昆彌將衆八萬餘口北
附康居謀欲借兵兼并兩昆彌漢復遣會宗與都護孫
建并力以備之自烏孫分立兩昆彌漢用憂勞且無寧

歲時康居復遣子侍漢貢獻都護郭舜上言本匈奴盛
時非以兼有烏孫康居故也及其稱臣妄非以失二國
也漢雖皆受其質子然三國內相輸遺交通如故亦相
候伺見便則發合不能相親信離不能相臣後以今言
之結配烏孫竟未有益反為中國生事然烏孫既結在
前今與匈奴俱稱臣義不可距而康居驕黠訖不肯拜
使者都護吏至其國坐之烏孫諸使下王及貴人先飲
食已乃飲啗都護吏故為無所省以夸旁國以此度之

何故遣子入侍其欲賈市為好辭之詐也匈奴百蠻大國今事漢甚備聞康居不拜且使單于有悔自卑之意宜歸其侍子絕勿復使以章漢家不通無禮之國漢為其新通重致遠人終羈縻不絕

武帝伐匈奴

漢武帝元光二年鴈門馬邑豪聶壹因大行王恢言匈奴初和親親信邊可誘以利致之伏兵襲擊必破之道也上召問公卿王恢曰臣聞全代之時北有彊胡之敵

內連中國之兵然尚得養老長幼種樹以時倉廩常實
匈奴不輕侵也今以陛下之威海內為一然匈奴侵盜
不已者無他以不恐之故耳臣竊以為擊之使韓安國
曰臣聞高皇帝嘗圍於平城七日不食及解圍反位而
無忿怒之心夫聖人以天下為度者也不以己私怒傷
天下之公故遣劉敬結和親至今為五世利臣竊以為
勿擊便恢曰不然高帝身被堅執銳行幾十年所以不
報平城之怨者非力不能所以休天下之心也今邊境

數驚士卒傷死中國轎車相望此仁人之所隱也故曰
擊之便安國曰不然臣聞用兵者以飽待饑正治以待
其亂定舍以待其勞故接兵覆衆伐國墮城常坐而役
敵國此聖人之兵也今將卷甲輕舉深入長敵難以為
功從行則迫脅衡行則中絕疾則糧乏徐則後利不至
千里人馬乏食兵法曰遺人獲也臣故曰勿擊便恢曰
不然臣今言擊之者固非發而深入也將順因單于之
欲誘而致之邊吾選集騎壯士陰伏而處以為之備審

遮險阻以為其戒吾勢已定或營其左或營其右或當其前或絕其後單于可擒百全必取上從恢議夏六月以御史大夫韓安國為護軍將軍衛尉李廣為驍騎將軍太僕公孫賀為輕車將軍大行王恢為將屯將軍太中大夫李息為材官將軍將車騎材官三十餘萬匿馬邑旁谷中約單于入馬邑縱兵陰使聶壹為間亡入匈奴謂單于曰吾能斬馬邑令丞以城降財物可盡得單于愛信以為然而許之聶壹乃詐斬死罪囚縣其頭馬

邑城下示單于使者為信曰馬邑長吏已死可急來於是單于穿塞將十萬騎入武州塞未至馬邑百餘里見畜布野而無人牧者怪之乃攻亭得鴈門尉史欲殺之尉史乃告單于漢兵所居單于大驚曰吾固疑之乃引兵還出曰吾得尉史天也以尉史為天王塞下傳言單于已去漢兵追至塞度弗及乃皆罷兵王恢主別從代出擊胡輜重聞單于還兵多亦不敢出上怒恢恢曰始約為入馬邑城兵與單于接而臣擊其輜重可得利今

單于不至而還臣以三萬人衆不敵祇取辱固知還而
斬然完陛下士三萬人於是下恢廷尉廷尉當恢逗撓
當斬恢行千金丞相蚡蚡不敢言上而言於太后曰王
恢首為馬邑事今不成而誅恢是為匈奴報讎也上朝
太后太后以蚡言告上上曰首為馬邑事者恢故發天
下兵數十萬從其言為此且縱單于不可得恢所部擊
其輜重猶頗可得慰士大夫心今不誅恢無以謝天
下於是恢聞乃自殺自是之後匈奴絕和親攻當路塞

往往入盜於漢邊不可勝數然尚貪樂關市嗜漢財物
漢亦關市不絕以中其意

六年冬匈奴入上谷殺略吏民遣車騎將軍衛青出上
谷騎將軍公孫敖出代輕車將軍公孫賀出雲中驍騎
將軍李廣出鴈門各萬騎擊胡關市下衛青至龍城得
胡首虜七百人公孫賀無所得公孫敖為胡所敗亡七
千騎李廣亦為胡所敗胡生得廣置兩馬間絡而盛卧
行十餘里廣佯死暫騰而上敵人馬上奪其弓鞭馬南

馳遂得脫歸漢下教廣吏當斬贖為庶人唯青賜爵關
內侯 秋匈奴數盜邊漁陽尤甚以衛尉韓安國為材
官將軍屯漁陽

元朔元年秋匈奴二萬騎入漢殺遼西太守略二千餘
人圍韓安國壁又入漁陽鴈門各殺略千餘人安國益
東徙屯北平數月病死天子乃復召李廣拜為右北平
太守匈奴號曰漢之飛將軍避之數歲不敢入右北平
車騎將軍衛青將三萬騎出鴈門將軍李息出代青

斬首虜數千人 臨菑人主父偃乃上書言九事其八
事為律令一事諫伐匈奴其辭曰司馬法曰國雖大好
戰必亡天下雖平忘戰必危夫怒者逆德也兵者凶器
也爭者末節也夫務戰勝窮武事者未有不悔者也昔
秦皇帝并吞戰國務勝不休欲攻匈奴李斯諫曰不可
夫匈奴無城郭之居委積之守遷徙鳥舉難得而制也
輕兵深入糧食必絕踵糧以行重不及事得其地不足
以為利也得其民不可調而守也勝必殺之非民父母

也靡敝中國快心匈奴非長策也秦皇帝不聽遂使蒙恬將兵攻胡辟地千里以河為境地固沮澤鹹鹵不生五穀然後發天下丁男以守北河暴兵露師十有餘年死者不可勝數終不能踰河而北是豈人衆不足兵革不備哉其勢不可也又使天下蜚芻輓粟起於黃腫琅邪負海之郡轉輸北河率三十鍾而致一石男子疾耕不足於糧餉女子紡績不足於帷幕百姓靡敝孤寡老弱不能相養道路死者相望蓋天下始畔秦也及至高

皇帝定天下略地於邊聞匈奴聚於代谷之外而欲擊之御史成進諫曰不可夫匈奴之性獸聚而鳥散從之如搏影今以陛下盛德攻匈奴臣竊危之高帝不聽遂北至於代谷果有平城之圍高皇帝蓋悔之甚乃使劉敬往結和親之約然後天下忘干戈之事夫匈奴難得而制非一世也行盜侵驅所以為業也天性固然上及虞夏殷周固弗程督禽獸畜之不屬為人夫上不觀虞夏殷周之統而下循近世之失此臣之所大憂百姓之

所疾苦也嚴安上書曰昔秦王意廣心逸欲威海外使
蒙恬將兵以北攻胡又使尉屠睢將樓船之士以攻越
當是時秦禍北構於胡南挂於越宿兵於無用之地進
而不得退行十餘年丁男被甲丁女轉輸苦不聊生自
經於道樹死者相望及秦皇帝崩而天下大畔滅世絕
祀窮兵之禍也故周失之弱秦失之彊不變之患也今
徇南夷朝夜郎降羌焚略葳州建城邑深入匈奴燔其
龍城議者美之此人臣之利非天下之長策也書奏天

子召見謂曰公等皆安在何相見之晚也皆拜為郎中
二年冬匈奴入上谷漁陽殺略吏民千餘人遣衛青李
息出雲中以西至隴西擊胡之樓煩白羊王於河南得
胡首虜數千牛羊百餘萬走白羊樓煩王遂取河南地
詔封青為長平侯青校尉蘇建張次公皆有功封建為
平陵侯次公為岸頭侯主父偃言河南地肥饒外阻河
蒙恬城之以逐匈奴內省轉輸戍漕廣中國滅胡之本
也上下公卿議皆言不便上竟用偃計立朔方郡使蘇

建興十餘萬人築朔方城復繕故秦時蒙恬所為塞因
河為固轉漕甚遠自山東咸被其勞費數十百鉅萬府
庫並虛漢亦棄上谷之斗辟縣造陽地以予胡 夏募
民徙朔方十萬口

三年冬匈奴軍臣單于死其弟左谷蠡王伊稚斜自立
為單于攻破軍臣單于太子於單於降漢 夏四月丙
子封匈奴太子於單為涉安侯數月而卒 匈奴數萬
騎入塞殺代郡太守恭及略千餘人 秋匈奴又入鴈

門殺略千餘人

四年夏匈奴入代郡定襄上郡各三萬騎殺略數千人
五年匈奴右賢王數侵擾朔方天子令車騎將軍青將
三萬騎出高闕衛尉蘇建為游擊將軍左內史李沮為
彊弩將軍太僕公孫賀為騎將軍代相李蔡為輕車將
軍皆領屬車騎將軍俱出朔方大行李息岸頭侯張次
公為將軍俱出右北平凡十餘萬人擊匈奴右賢王以
為漢兵遠不能至飲酒醉衛青等兵出塞六七百里夜

至圍右賢王右賢王驚夜逃獨與壯騎數百馳潰圍北
去得右賢裨王十餘人衆男女萬五千餘人畜數十百
萬於是引兵而還至塞天子使使者持大將軍印即軍
中拜衛青為大將軍諸將皆屬焉夏四月乙未復益封
青八千七百戶封青三子伉不疑登皆為列侯 秋匈
奴萬騎入代殺都尉朱英略千餘人

六年春二月大將軍青出定襄擊匈奴以合騎侯公孫
敖為中將軍太僕公孫賀為左將軍翕侯趙信為前將

軍衛尉蘇建為右將軍郎中令李廣為後將軍左內史
李沮為彊弩將軍咸屬大將軍斬首數千級而還休士
馬於定襄雲中鴈門 夏四月衛青復將六將軍出定
襄擊匈奴斬首虜萬餘人右將軍建前將軍信并軍三
千餘騎獨逢單于兵與戰一日餘漢兵且盡信故胡小
王降漢漢封信翁侯及敗匈奴誘之遂將其餘騎可八
百降匈奴建盡亡其軍脫身亡自歸大將軍議郎周霸
曰自大將軍出未嘗斬裨將今建棄軍可斬以明將軍

之威軍正閤長史安曰不然兵法小敵之堅大敵之禽也今建以數千當軍于數萬力戰一日餘士盡不敢有二心自歸而斬之是示後無反意也不當斬大將軍曰青幸得以肺腑待罪行間不患無威而霸說我以明威甚失臣意且使臣職雖當斬將以臣之尊寵而不敢自擅誅於境外而具歸天子天子自裁之於以見為人臣不敢專權不亦可乎軍吏皆曰善遂因建詣行在所初平陽縣吏霍仲孺給事平陽侯家與青姊衛少兒私通

生霍去病去病年十八為侍中善騎射再從大將軍擊匈奴為票姚校尉與輕勇騎八百直棄大軍數百里赴利斬捕首虜過當於是天子曰票姚校尉去病斬首虜二千餘級得相國當戶斬單于大父行藉若侯產生捕季父羅姑比再冠軍封去病為冠軍侯上谷太守郝賢四從大將軍捕斬首虜二千餘級封賢為衆利侯是歲失兩將軍亡翕侯軍功不多故大將軍不益封止賜千金右將軍建至天子不誅贖為庶人單于既得翕侯以

為自次王用其姊妻之與謀漢信教單于益北絕募以
誘罷漢兵徼極而取之無近塞單于從其計是時漢比
歲發十餘萬衆擊邊斬捕首虜之士受賜黃金二十餘
萬斤而漢軍士馬死者十餘萬兵甲轉漕之費不與焉
於是大司農經用竭不足以奉戰士六月詔令民得買爵
及贖禁錮免臧罪置賞官名曰武功爵級十七萬凡直
三十餘萬金諸買武功爵至千夫者得先除為吏吏道
雜而多端官職耗廢矣

元狩元年夏五月匈奴萬人入上谷殺數百人

二年三月霍去病為票騎將軍將萬騎出隴西擊匈奴
歷五王國轉戰六日過焉支山千餘里殺折蘭王斬盧
侯王執渾邪王子及相國都尉獲首虜八千九百餘級
收休屠王祭天金人詔益封去病二千戶夏去病復與
合騎侯公孫敖將數萬騎俱出北地異道衛尉張騫郎
中令李廣俱出右北平異道廣將四千騎先行可數百
里騫將萬騎在後匈奴左賢王將四萬騎圍廣廣軍士

皆恐廣乃使其子敢獨與數十騎馳貫胡騎出其左右而還告廣曰胡虜易與耳軍士乃安廣為圍陳外嚮胡急擊之矢下如雨漢兵死者過半漢矢且盡廣乃令士持滿毋發而廣身自以大黃射其裨將殺數人胡虜益解會日暮吏士皆無人色而廣意氣自如益治軍軍中皆服其勇明日復力戰死者過半所殺亦過當會博望侯軍亦至匈奴軍乃解去漢軍罷弗能追罷歸漢法博望侯留遲後期當死贖為庶人廣軍功自如無賞而宗

騎將軍去病深入二千餘里與合騎侯失不相得票騎將軍踰居延過小月氏至祁連山得單桓苗涂王及相國都尉以衆降者二千五百人斬首虜三萬二百級獲裨小王七十餘人天子益封去病五千戶封其裨將有功者鷹擊司馬趙破奴為從票侯校尉高不識為宜冠侯校尉僕多為輝渠侯合騎侯敖坐行留不與票騎會當斬贖為庶人是時諸宿將所將士馬兵皆不如票騎票騎所將常選然亦敢深入常與壯騎先其大軍軍亦

有天幸未嘗困絕也而諸宿將常留落不偶由此票騎
日以親貴比大將軍矣匈奴入代鴈門殺略數百人
秋匈奴渾邪王降是時單于怒渾邪王休屠王居西
方爲漢所殺虜數萬人欲召誅之渾邪王與休屠王恐
謀降漢先遣使向邊境要遮漢人令報天子是時大行
李息將城河上得渾邪王使即馳傳以聞天子聞之恐
其以詐降而襲邊乃令票騎將軍將兵往迎之休屠王
後悔渾邪王殺之并其衆票騎既渡河與渾邪王衆相

望渾邪王裨將見漢軍而多不欲降者頗遁去票騎乃馳入得與渾邪王相見斬其欲亡者八千人遂獨遣渾邪王乘傳先詣行在所盡將其衆渡河降者四萬餘人號稱十萬既至長安天子所以賞賜者數十巨萬封渾邪王萬戶為漯陰侯封其裨王呼毒尼等四人皆為列侯益封票騎千七百戶渾邪之降也漢發車二萬乘以迎之縣官無錢從民贖馬民或匿馬馬不具上怒欲斬長安令右內史汲黯曰長安令無罪獨斬臣黯民乃肯

出馬且匈奴畔其主而降漢漢徐以縣次傳之何至令天下騷動罷敝中國而以事夷狄之人乎上默然及渾邪至賈人與市者坐當死五百餘人黯請問見高門曰夫匈奴攻當路塞絕和親中國興兵誅之死傷者不可勝計而費以巨萬百數臣愚以為陛下得胡人皆以為奴婢以賜從軍死事者家所鹵獲因予之以謝天下之苦塞百姓之心今縱不能渾邪率數萬之衆來降虛府庫賞賜發良民侍養譬若奉驕子愚民安知市買長

安中物而文吏繩以為闢出財物于邊關乎陛下縱不能得匈奴之資以謝天下又以微文殺無知者五百餘人是所謂庇其葉而傷其枝者也臣竊為陛下不取也上默然不許曰吾久不聞汲黯之言今又復妄發矣居頃之乃分徙降者邊五郡故塞外而皆在河南因其故俗為五屬國而金城河西西並南山至鹽澤空無匈奴匈奴時有候者到而希矣

三年秋匈奴入右北平定襄各數萬騎殺略千餘人漢

既得渾邪王地隴西北地上郡益少邊寇詔減三郡戍卒之半以寬天下之繇

四年上與諸將議曰翁侯趙信為單于畫計常以為漢兵不能度幕輕留今大發士卒其勢必得所欲乃粟馬十萬令大將軍青票騎將軍去病各將五萬騎私負從馬復四萬匹步兵轉者踵軍後又數十萬人而敢力戰深入之士皆屬票騎票騎始為出定襄當單于捕虜言單于東乃更令票騎出代郡令大將軍出定襄郎中令

李廣數自請行天子以為老弗許良久乃許之以為前將軍太僕公孫賀為左將軍主爵都尉趙食其為右將軍平陽侯曹襄為後將軍皆屬大將軍趙信為單于謀曰漢兵既度幕人馬罷匈奴可坐收虜耳乃悉遠北其輜重以精兵待幕北大將軍青既出塞捕虜知單于所居乃自以精兵走之而令前將軍廣并於右將軍軍出東道東道回遠而水草少廣自請曰臣部為前將軍今大將軍乃徙令臣出東道且臣結髮而與匈奴戰今乃

一得當單于臣願居前先死單于大將軍亦陰受上誠
以為李廣老數奇毋令當單于恐不得所欲而公孫敖
新失侯大將軍亦欲使敖與俱當單于故徙前將軍廣
廣知之固自辭於大將軍大將軍不聽廣不謝而起行
意甚愠怒大將軍出塞千餘里度幕見單于兵陳而待
於是大將軍令武剛車自環為營而縱五千騎往當匈
奴匈奴亦縱可萬騎會日且入大風起砂礫擊面兩軍
不相見漢益縱左右翼繞單于單于視漢兵多而士馬

尚彊自度戰不能如漢兵單于遂乘六騾壯騎可數百
直冒漢圍西北馳去時已昏漢匈奴相紛拏殺傷大當
漢軍左校捕虜言單于未昏而去漢軍發輕騎夜追之
大將軍軍因隨其後匈奴兵亦散走遲明行二百餘里
不得單于捕斬首虜萬九千級遂至寘顏山趙信城得
匈奴積粟食軍留一日悉燒其城餘粟而歸前將軍廣
與右將軍食其軍無導惑失道後大將軍不及單于戰
大將軍引還過幕南乃遇二將軍大將軍使長史責問

廣食其失道狀急責廣之幕府對簿廣曰諸校尉無罪
乃我自失道吾今自上簿至幕府廣謂其麾下曰廣結
髮與匈奴大小七十餘戰今幸從大將軍出接單于兵
而大將軍徙廣部行回遠而又迷失道豈非天哉且廣
年六十餘矣終不能復對刀筆之吏遂引刀自剄廣為
人庶得賞賜輒分其麾下飲食與士共之為二千石四
十餘年家無餘財援臂善射度不中不發將兵乏絕之
處見水士卒不盡飲廣不近水士卒不盡食廣不嘗食

士以此愛樂為用及死一軍皆哭百姓聞之知與不知
無老壯皆為垂涕而右將軍獨下吏當死贖為庶人單
于之遁走其兵往往與漢兵相亂而隨單于單于久不
與其大眾相得其右谷蠡王以為單于死乃自立為單
于十餘日真單于復得其眾而右谷蠡王乃去其單于
號票騎將軍騎兵車重與大將軍軍等而無裨將悉以
李敢等為大校當裨將出代右北平二千餘里絕大幕
直左方兵獲屯頭王韓王等三人將軍相國當戶都尉

八十三人封狼居胥山禪於姑衍登臨翰海鹵獲七萬
四百四十三級天子以五千八百戶益封票騎將軍又
封其所部右北平太守路博德等四人為列侯從票侯
破奴等二人益封校尉敢為關內侯食邑軍吏卒為官
賞賜甚多而大將軍不得益封軍吏卒皆無封侯者兩
軍之出塞塞閼官及私馬凡十四萬匹而復入塞者不
滿三萬匹乃益置大司馬位大將軍票騎將軍皆為大
司馬定令令票騎將軍秩祿與大將軍等自是之後大

將軍青日退而票騎日益貴大將軍故人門下士多去
事票騎輒得官爵唯任安不肯票騎將軍為人少言不
泄有氣敢往天子嘗欲教之孫吳兵法對曰顧方略何
如耳不至學古兵法天子為治第令票騎視之對曰匈奴
未滅無以家為也由此上益重愛之然少貴不肖士
其從軍天子為遣太官齎數十乘既還重車餘棄粱肉
而士有饑者其在塞外卒乏糧或不能自振而票騎尚
穿域蹋鞠事多此類大將軍為人仁喜士退讓以和柔

自媚於上兩人志操如此是時漢所殺虜匈奴合八九萬而漢士卒物故亦數萬是後匈奴遠遁而幕南無王庭漢度河自朔方以西至今居往往通渠置田官吏卒五六萬人稍蠶食匈奴以北然亦以馬少不復大出擊匈奴矣匈奴用趙信計遣使於漢好辭請和親天子下其議或言和親或言遂臣之丞相長史任敞曰匈奴新破困宜可使為外臣朝請於邊漢使任敞於單于單于大怒留之不遣是時博士狄山議以為和親便上以問

張湯湯曰此愚儒無知狄山曰臣固愚忠若御史大夫湯乃詐忠於是上作色曰吾使生居一郡能無使虜入盜乎曰不能曰居一縣對曰不能復曰居一障間山自度辯窮且下吏曰能於是上遣山乘障至月餘匈奴斬山頭而去自是以後羣臣震懼無敢忤湯者

六年秋九月冠軍景桓侯霍去病薨天子甚悼之為冢像祁連山

元鼎三年匈奴伊穉斜單于死子烏維單于立

元封元年冬十月下詔曰南越東甌咸伏其辜西蠻北夷頗未輯睦勝將巡邊垂躬秉武節置十二部將軍親帥師焉乃行自雲陽北歷上郡西河五原出長城北登單于臺至朔方臨北河勒兵十八萬騎旌旗徑千餘里以見武節威匈奴遣使者郭吉告單于曰南越王頭已縣於漢北關今單于能戰天子自將待邊不能即南面而臣於漢何徒遠走亡匿於幕北寒苦無水草之地毋為也語卒而單于大怒立斬主客見者而留郭吉遷之

北海上然匈奴亦讐終不敢出上乃還

四年匈奴自衛霍度幕以來希復為寇遠徙北方休
養士馬習射獵數使使於漢好辭甘言求請和親漢使
北地人王烏等窺匈奴烏從其俗去節入穹廬單于愛
之佯許甘言為遣其太子入漢為質漢使楊信於匈奴
信不肯從其俗單于曰故約漢嘗遣翁主結繒絮食物
有品以和親而匈奴亦不擾邊今乃欲反古令吾太子
為質無幾矣信既歸漢又使王烏往而單于復調以甘

言欲多得漢財物始謂王烏曰吾欲入漢見天子面相
約為兄弟王烏歸報漢漢為單于築邸于長安匈奴曰
非得漢貴人使吾不與誠語匈奴使其貴人至漢病漢
子藥欲愈之不幸而死漢使路充國佩二千石印綬往
使因送其喪厚直數千金曰此漢貴人也單于以為漢
殺吾貴使者乃留路充國不歸諸所言者單于特空給
王烏殊無意入漢及遣太子於是匈奴數使奇兵侵犯
漢邊乃拜郭昌為拔胡將軍及浞野侯屯朔方以東備

胡

六年 匈奴烏維單于死子烏師廬立年少號兒單于
自此之後單于益西北徙左方兵直雲中右方直酒泉
燉煌郡

太初元年匈奴兒單于好殺伐國人不安又有天災畜
多死左大都尉使人間告漢曰我欲殺單于降漢漢遠
即兵來迎我我即發上乃遣因杆將軍公孫敖築塞外
受降城以應之

二年上猶以受降城去匈奴遠遣浚稽將軍趙破奴將二萬餘騎出朔方西北二千餘里期至浚稽山而還浞野侯既至期左大都尉欲發而覺單于誅之發左方兵擊浞野侯浞野侯行捕首虜得數千人還未至受降城四百里匈奴兵八萬騎圍之浞野侯夜自出求水匈奴間捕生得浞野侯因急擊其軍軍吏畏亡將而誅莫相勸歸者軍遂沒於匈奴兒單于大喜因遣奇兵攻受降城不能下乃寇入邊而去

三年春正月匈奴兒單于死子年少匈奴立其季父右
賢王响犁湖為單于 上遣光祿勳徐自為出五原塞
數百里遠者千餘里築城障列亭西北至廬朐而使游
擊將軍韓說長平侯衛伉屯其旁使彊弩都尉路博德
築居延澤上秋匈奴大入定襄雲中殺略數千人敗數
二千石而去行破壞光祿所築城列亭障又使右賢王
入酒泉張掖略數千人會軍正任文擊救盡復失所得
而去

四年冬匈奴响犂湖單于死匈奴立其弟左大都尉且鞮侯為單于天子欲因伐宛之威遂困朔方乃下詔曰高皇帝遺朕平城之憂高后時單于書絕悖逆昔齊襄公復九世之讎春秋大之且鞮侯單于初立恐漢襲之乃曰我兒子安敢望漢天子漢天子我丈人行也因盡歸漢使之不降者路充國等使使來獻

天漢元年三月上嘉匈奴單于之義遣中郎將蘇武送匈奴使留在漢者因厚賂單于答其善意武與副中郎

將張勝及假吏常惠等俱既至匈奴置幣遺單于單于
益驕非漢所望也會緄王與長水虞常等及衛律所將
降者陰相與謀劫單于母閼氏歸漢衛律者父故長水
人律善協律都尉李延年延年薦言律使於匈奴使還聞
延年家收遂亡降匈奴單于愛之與謀國事立為丁靈
王虞常在漢時素與副張勝相知私候勝曰聞漢天子
甚怨衛律常能為漢伏弩射殺之吾母弟在漢幸蒙其
賞賜張勝許之以貨物與常後月餘單于出獵獨閼氏

子弟在虞常等七十餘人欲發其一人夜亡告之單于
子弟發兵與戰緱王等皆死虞常生得單于使衛律治
其事張勝聞之恐前語發以狀語武武曰事如此此必
及我見犯乃死重負國欲自殺勝惠共止之虞常果引
張勝單于怒召諸貴人議欲殺漢使者左伊秩訾曰即
謀單于何以復加宜皆降之單于使衛律召武受辭武
謂惠等屈節辱命雖生何面目以歸漢引佩刀自刺衛
律驚自抱持武馳召醫鑿地為坎置煨火覆武其上蹈

其背以出血武氣絕半日復息惠等哭輿歸營單于壯其節朝夕遣人候問武而收繫張勝武益愈單于使使曉武欲降之會論虞常欲因此時降武劔斬虞常已律曰漢使張勝謀殺單于近臣當死單于募降者赦罪舉劔欲擊之勝請降律謂武曰副有罪當相坐武曰本無謀又非親屬何謂相坐復舉劔擬之武不動律曰蘇君律前負漢歸匈奴幸蒙大恩賜號稱王擁衆數萬馬畜彌山富貴如此蘇君今日降明日復然空以身膏草野

誰復知之武不應律曰君因我降與君為兄弟今不聽吾計後雖欲復見我尚可得乎武罵律曰汝為人臣子不顧恩義畔主背親為降虜於蠻夷何以汝為見且單于信汝使決人死生不平心持正反欲闕兩主觀禍敗南越殺漢使者屠為九郡宛王殺漢使者頭縣北闕朝鮮殺漢使者即時誅滅獨匈奴未耳若知我不降明欲令兩國相攻匈奴之禍從我始矣律知武終不可脅白單于單于愈益欲降之乃幽武置大窖中絕不飲食天雨

雪武卧齧雪與旃毛并咽之數日不死匈奴以為神乃徙武北海無人處使牧羝曰羝乳乃得歸別其官屬常惠等各置他所浞野侯趙破奴自匈奴亡歸

二年夏五月遣貳師將軍廣利以三萬騎出酒泉擊右賢王於天山得寇首虜萬餘級而還匈奴大圍貳師將軍漢軍乏食數日死傷者多假司馬隴西趙充國與壯士百餘人潰圍陷陳貳師引兵隨之遂得解漢兵物故什六七充國身被二十餘創貳師奏狀詔徵充國詣行

在所帝親見視其創嗟歎之拜為中郎漢復使因杆將軍教出西河與彊弩都尉路博德會涿涂山無所得初李廣有孫陵為侍中善騎射愛人下士帝以為有廣之風拜騎都尉使將丹陽楚人五千人教射酒泉張掖以備胡及貳師擊匈奴上詔陵欲使為貳師將輜重陵叩頭自請曰臣所將屯邊者皆荆楚勇士奇材劍客也力扼虎射命中願得自當一隊到蘭于山南以分單于兵毋令專鄉貳師軍上曰將惡相屬邪吾發軍多無騎子

女陵對無所事騎臣願以少擊衆步兵五千人涉單于
庭上壯而許之因詔路博德將兵半道迎陵軍博德亦
羞為陵後距秦言方秋匈奴馬肥未可與戰願留陵至
春俱出上怒疑陵悔不欲出而教博德上書乃詔博德
引兵擊匈奴於西河詔陵以九月發出遮虜障至東浚
稽山南龍勒水上徘徊觀虜即亡所見還抵受降城休
士陵於是將其步卒五千人出居延北行三十日至浚
稽山止營舉圖所過山川地形使麾下騎陳步樂還以

聞步樂召見道陵將率得士死力上甚悅拜步樂為郎
陵至浚稽山與單于相值騎可三萬圍陵軍軍居兩山
間以大車為營陵引士出營外為陳前行持戟盾後行
持弓弩虜見漢軍少直前就營陵搏戰攻之千弩俱發
應弦而倒虜還走上山漢軍追擊殺數千人單于大驚
召左右地兵八萬餘騎攻陵陵且戰且引南行數日抵
山谷中連戰士卒中矢傷三創者載輦兩創者將車一
創者持兵戰復斬首三千餘級引兵東南循故龍城道

行四五日抵大澤葭葦中虜從上風縱火陵亦令軍中縱火以自救南行至山下單于在南山上使其子將騎擊陵陵軍步闕樹木間復殺數千人因發連弩射單于單于下走是日捕得虜言單于曰此漢精兵擊之不能下日夜引吾南近塞得毋有伏兵乎諸當戶君長皆言單于自將數萬騎擊漢數千人不能滅後無以復使邊臣令漢益輕匈奴復力戰山谷間尚四五十里得平地不能破乃還是時陵軍益急匈奴騎多戰一日數十合

復傷殺虜二千餘人虜不利欲去會陵軍候管敢為校尉所辱亡降匈奴具言陵軍無後救射矢且盡獨將軍麾下及校尉成安侯韓延年各八百人為前行以黃與白為幟當使精騎射之即破矣單于得敢大喜使騎並攻漢軍疾呼曰李陵韓延年趣降遂遮道急攻陵陵居谷中虜在山上四面射矢如雨下漢軍南行未至鞬汗山一日五十萬矢皆盡即棄車去士尚三千餘人徒斬車輻而持之軍吏持尺刀抵山入陁谷單于遮其後乘

隅下壘石士卒多死不得行昏後陵便衣獨步出營止
左右母隨我大夫一取單于耳良久陵還太息曰兵敗
死矣於是盡斬旌旗及珍寶埋地中陵歎曰復得數十
矢足以脫矣今無兵復戰天明坐受縛矣各鳥獸散猶
有得脫歸報天子者令軍士人持二升糲一片冰期至
遮虜障者相待夜半時擊鼓起士鼓不鳴陵與韓延年
俱上馬壯士從者十餘人虜騎數千追之韓延年戰死
陵曰無面目報陛下遂降軍人分散脫至塞者四百餘

人陵敗處去塞百餘里邊塞以聞上欲陵死戰後聞陵
降上怒甚責問陳步樂步樂自殺羣臣皆罪陵上以問
太史令司馬遷遷盛言陵事親孝與士信常奮不顧身
以徇國家之急其素所畜積也有國士之風今舉事一
不幸全軀保妻子之臣隨而媒蘖其短誠可痛也且陵
提步卒不滿五千深蹂戎馬之地抑數萬之師虜救死
扶傷不暇悉舉引弓之民共攻圍之轉鬪千里矢盡道
窮士張空拳冒白刃北首爭死敵得人之死力雖古名

將不過也身雖陷敗然其所摧敗亦足暴於天下彼之不死宜欲得當以報漢也上以遷為誣罔欲沮貳師為陵游說下遷腐刑久之上悔陵無救曰陵當發出塞乃詔彊弩都尉令迎軍坐預詔之得令老將生姦詐乃遣使勞賜陵餘軍得脫者

三年秋匈奴入鴈門太守坐畏悞棄市

四年春正月發天下七科謫及勇敢士遣貳師將軍李廣利將騎六萬步兵七萬出朔方彊弩都尉路博德將

萬餘人與貳師會游擊將軍韓說將步兵三萬人出五
原因杆將軍公孫敖將騎萬步兵三萬人出鴈門匈奴
聞之悉遠其累重於余吾水北而單于以兵十萬待水
南與貳師接戰貳師解而引歸與單于連鬪十餘日游
擊無所得因杆與左賢王戰不利引歸時上遣敖深入
匈奴迎李陵教軍無功還因曰捕得生口言李陵教單
于為兵以備漢軍故臣無所得上於是族陵家既而聞
之乃漢將降匈奴者李緒非陵也陵使人刺殺緒大闕

氏欲殺陵單于匿之北方大闕氏死乃還單于以女妻陵立為右校王與衛律皆貴用事衛律常在單于左右陵居外有大事乃入議

太始元年匈奴且鞮侯單于死有兩子長為左賢王次為左大將左賢王未至貴人以為有病更立左大將為單于左賢王聞之不敢進左大將使人召左賢王而讓位焉左賢王辭以病左大將不聽謂曰即不幸死傳之於我左賢王許之遂立為狐鹿姑單于以左大將為

左賢王數年病死其子先賢擇不得代更以為日逐王
單于自以其子為左賢王

征和二年九月匈奴入上谷五原殺掠吏民

三年春正月匈奴入五原酒泉殺兩都尉三月遣李廣
利將七萬人出五原商丘成將二萬人出西河馬通將
四萬騎出酒泉擊匈奴 夏五月匈奴單于聞漢兵大
出悉徙其輜重北邸鄯居水左賢王驅其人民度余吾
水六七百里居兜銜山單于自將精兵度姑且水商丘

成軍至追邪徑無所見還匈奴使大將與李陵將三萬
餘騎追漢軍轉戰九日至蒲奴水虜不利還去馬通軍
至天山匈奴使大將偃渠將二萬餘騎要漢兵見漢兵
彊引去通無所得失是時漢恐車師兵遮馬通軍遣開
陵侯成婉將樓蘭尉犁危須等六國兵共圍車師盡得
其王民衆而還貳師將軍出塞匈奴使右大都尉與衛
律將五千騎要擊漢軍於夫羊句山陁貳師擊破之乘
勝追北至范夫人城匈奴犇走莫敢距敵初貳師之出

也丞相劉屈氂為祖道送至渭橋廣利曰願君侯早請
昌邑王為太子如立為帝君侯長何憂乎屈氂許諾昌
王者貳師將軍女弟李夫人子也貳師女為屈氂子妻
故共欲立焉會內者令郭穰告丞相夫人祝詛上及與
貳師共禱祠欲令昌邑王為帝按驗罪至大逆不道六
月詔載屈氂厨車以拘要斬東市妻子梟首華陽街貳
師妻子亦收貳師聞之憂懼其掾胡亞夫亦避罪從軍
說貳師曰夫人室家皆在吏若還不稱意適與獄會邪

居以北可復得見乎貳師由是狐疑深入要功遂北至
郅居水上虜已去貳師遣護軍將二萬騎度郅居之水
逢左賢王左大將將二萬騎與漢軍合戰一日漢軍殺
左大將虜死傷甚衆軍長史與決眊都尉輝渠侯謀曰
將軍懷異心欲危衆求功恐必敗謀共執貳師貳師聞
之斬長史引兵還至燕然山單于知漢軍勞倦自將五
萬騎遮擊貳師相殺傷甚衆夜塹漢軍前深數尺從後
急擊之軍大亂敗貳師遂降單于素知其漢大將以女

妻之尊寵在衛律上宗族遂滅

四年夏六月丁巳以大鴻臚田千秋為丞相封富民侯
千秋無他材能術學又無伐閱功勞特以一言寤意數
月取宰相封侯世未嘗有也然為人敦厚有智居位自
稱踰於前後數公先是搜粟都尉桑弘羊與丞相御史
奏言輪臺東有溉田五千頃以上可遺屯田卒置校尉
三人分護益種五穀張掖酒泉遣騎假司馬為斥候募
民壯健敢徙者詣田所益墾溉田稍築列亭連城而西

以威西國輔烏孫上乃下詔深陳既往之悔曰前有司
奏欲益民賦三十助邊用是重困老弱孤獨也而今又
請遣卒田輪臺輪臺西於車師千餘里前開陵侯擊車
師時雖勝降其王以遼遠乏食道死者尚數千人況益
西乎曩者朕之不明以軍候弘上書言匈奴縛馬前後
足置城下馳言秦人我匈若馬又漢使者久留不還故
興遣貳師將軍欲以為使者威重也古者卿大夫與謀
參以蓍龜不吉不行乃者以縛馬書徧視丞相御史二

千石諸大夫卽為文學者乃至郡屬國都尉等皆以虜
自縛其馬不祥甚哉或以為欲以見彊夫不足者視人
有餘公車方士太史治星望氣及太卜龜蓍皆以為吉
匈奴必破時不可再得也又曰北伐行將於鬴山必克
封諸將貳師最吉故朕親發貳師下鬴山詔之必毋深
入今計謀卦兆皆反繆重合侯得虜候者乃言縛馬者
匈奴詛軍事也匈奴常言漢極大然不耐饑渴失一狼
走千羊乃者貳師敗軍士死畧離散悲痛常在朕心今

又請遠田輪臺欲起亭隧是擾勞天下非所以優民也
朕不忍聞大鴻臚等又議欲募囚徒送匈奴使者明封
侯之賞以報忿此五伯所弗為也且匈奴得漢降者常
提掖搜索問以所聞豈得行其計乎當今務在禁苛暴
止擅賦力本農修馬復令補缺毋乏武備而已郡國二
千石各上進畜馬方畧補邊狀與計對由是不復出軍
而封田千秋為富民侯以明休息思富養民也

通鑑紀事本末卷三上